

近代中國史料叢刊第九十七輯
沈雲龍主編

退廬筆記
夏荃纂

文海出版社有限公司印行

海陵叢刻 第一種 退庵筆記

退庵筆記敘

秦州夏君退庵編輯海陵文徵詩徵凡數十卷蒐羅之富不減篁墩其桑梓舊聞衣冠盛事故書雅記軼行遺文下及技藝寸長鄉閭瑣語莫不辨非求是援古證今而意本表微旨存懲世鍼發俗耳規正方書洵足以饋饜方來推闡在昔也曩余撰寶應圖經脫橐之後別爲詩事人事猥冗業未迄成君閉門課子修學著書流覽緣緜旁稽金石日月哀積勒成一編在小說雜家間固夢溪香祖之流亞也道光十九年四月下旬寶應劉寶楠撰

退庵筆記

卷一

周易口義

徐神翁語錄

吳陵志

秦州志

陸志

東城集

繪事微言

陋軒詩四刻

詩觀二集

詩觀無四集

依歸草

東陵聖母

樂真人

范文正

王禹錫

周陳

蔡攬

顧仲庸

陶敬宣

趙實可趙師涉

三王良

鄉俗語

退庵筆記卷一

泰州夏荃退庵纂

周易口義

周易口義十三卷安定先生撰其稿藏公二十三世孫其柔家康熙二十一

年商人胡遵淡覬覦奉祀冒認公裔其黨胡樸胡之澤等助之勢張甚其柔

不得已一訴於學使趙公崧一再訴於鹺使裴公充美兩公下其獄於揚州

訓導丁公德明問焉遂取泰州如皋志及兩造所呈胡氏家乘彙勘其柔譜

載安定公父諱訥公子三人志康志寧志正康寧同登慶曆丙戌賈黯榜進

士與宋史悉合遵淡譜載公父諱天德公子四人樟楠椿檜支離紕繆真贋

不待辨乃具詳定案時其柔並呈公所著周易口義十三卷以昭世守會乙

丑吉水李公振裕視學江省檄所屬造報先賢各祠購訪遺書訓導丁公因

取口義上之李公卽捐廉付梓凡校讎監督皆屬之丁公焉復念其柔爲安定嫡派宜奉公祀特命其柔子光烈爲奉祀生給帖在案此周易口義付梓之原委也使非遵濛冒認此書將終藏其柔家祕不復出其子孫能世守與否均不可知卽世守亦不過胡氏一家之書安能刊布使海內得窺公著述於萬一邪然則遵濛雖非公之裔孫未始非公之功臣也若李公捐廉付梓丁公力任校讎監督之役其表章先賢厥功尤偉考州志藝文載公撰著十餘種今可見者周易口義一書而已其書爲公門人倪天隱所述故名口義州志又分易傳周易口義易繫辭說卦爲三種案口義卽易傳繫辭說卦附口義後無二書也吉水序言之甚詳

徐神翁語錄

兒孫自有兒孫計莫與兒孫作馬牛此世俗相傳句也不知實徐神翁語錢

塘厲樊榭輯宋詩紀事載翁全詩云汲汲光陰似水流隨時得過便須休兒孫自有兒孫計莫與兒孫作馬牛下注徐神翁語錄五字又小傳稱翁沒弟子苗希頤哀次其事爲語錄而州志所載地神獻土事稱見宋舍徐神翁語錄宋舍人名與紀事所載互異考樊榭紀事一書其編纂積二十年之久所引書不下千餘種多取資於揚州馬氏小玲龍山館藏本神翁語錄樊榭必親見之疑馬氏插架物矣馬氏書久散頃余採訪數年絕無知者翁而有靈尙期旦暮遇之

後閱宋無錫尤氏遂初堂書目道家類載徐神翁語錄延之淳熙時人去翁世次不遠故藏弄及之及檢別家書目均未載樊榭所見未知是刻本鈔本惜無可考晁氏郡齋讀書志有皇宋拾遺仙傳一卷載陳希夷徐神公

神翁本號

公神八人事蹟御製誥詞與夫詩記之類悉備神翁逸事此卷必多可採惜亦

無從見之

吳陵志

宋陳氏直齋書錄解題載吳陵志十卷云不著名氏淳熙壬寅所修後三年

乙巳太守錢塘萬鍾元亨屬僚佐參正而刻之考壬寅爲淳熙九年乙巳爲

淳熙十二年萬鍾知泰州在淳熙十年

新州志秩官作紹熙三年任誤

州志名宦鍾傳治績

頗著而獨軼刻志一事可據直齋說補之邑乘以吳陵志爲最久其撰人名

氏不著直齋固已明言之矣康熙府志藝文載吳陵志三十五卷下注淳熙

壬寅修此壬譌作王之始然語氣猶未甚隔闕尙可云鈔刻之譌至雍正府

志直注宋淳熙間壬寅修纂徑以年分爲人名矣嘉慶府志仍之道光新州

志又仍之

雍正州志失載此志

譌以傳譌靡所底止讀書偶有所見急爲標出以告後

之修志者

泰州志

州志最久者吳陵志十卷宋淳熙九年修十二年郡守萬鍾刻余前論之詳矣周輝清波雜志稱鹽席錢緡之數見吳陵志是也輝又論王俊又折林靈素事云近萬元亨典鄉郡雖載姓氏於圖經人物志偶遺此一節元亨鍾字也明焦弱侯國史經籍志史類地理載吳陵志十卷下注萬鍾二字可見此志明季時猶存淳祐間學官項預重修邑乘仍名吳陵志增爲十四卷見宋史藝文志距淳熙萬刻五十餘年矣元皇慶二年李德貞以內任被旨尹秦州暇日訪耆老得宋淳祐海陵志案即項預所修吳陵志重梓以行於志文一無增損悉仍其舊宮紫元太史從外家周公陽岡處得鈔本宋志卽淳祐志也此宋志略可考者明興百餘年無修志之舉其最初者正德志初儲公燾全公英創志彙未成而卒及正德間州牧金公廷瑞正德十四年任與通判謝公源留心志

事於學正陳公琦處得宋元舊本及儲全二公遺藁之半因屬陳公葺而完之邑諸生王輦等贊厥成釐爲八卷卷首有謝公源序一名嘉靖元年志見明史藝文志天一閣書目此明志最初本雍正府志載正德志州牧金廷瑞修嘉靖志州人全英修以一爲二誤矣萬曆間州人定海丞章文斗纂州志十二卷名甲辰志萬曆三十一名一名萬曆志雍正府志作州人章舉修誤天啟初州牧嶺南周公夢龍倡修州志永竣事解任去惠來翁公延壽攝州篆志適告成名癸亥志天啟三年一名天啟志周翁皆有序今翁序存而周序軼紫元太史云癸亥志葺自沈君沈沈君名沈字淵淵無錫人乃當日纂修者凡修志乘當時不過提倡其事其賢者尙肯留心否則視爲具文而已故秉筆者最重且志之純駁卽其人之臧否亦見故纂修之姓名不可沒此志康熙府志失載雍正府志稱爲州牧翁延壽修不知癸亥志周公倡之沈公纂之翁乃

適觀厥成觀翁序歸美周公可見若僅據序言定爲翁修恐未安至雍正州志備考書目直書秦州新志天啟癸亥劉萬春修尤非紫元太史云歲癸酉崇禎六年劉大參取癸亥志略一增刪可見大參崇禎癸酉志卽取天啟癸亥志爲底本然癸亥癸酉究係二志出自兩手相距十年不得卽云癸亥志爲大參筆也大參志十卷一名崇禎癸酉志一名劉志明板原刻流傳絕少余所見殘本而已癸亥志尤不可得今讀癸酉志魏姚及大參各序其中刪蕪補闕大參具有苦心定出癸亥志上及讀紫元太史庭聞州世說似不無遺議甚矣纂修之難也此明志一一可考者國朝康熙己亥四十年州牧萊蕪魏公錫祚因癸酉志板漫漶重付剗削自序於前人所纂不敢加損一字然癸酉志中所載如皋人物重刊本概從刪節考大參原志凡皋邑人物悉標如皋二字別之無慮混淆且康熙時皋尙隸秦人物例當附見刪去非是其志名

魏志一名康熙己亥志實卽劉大參崇禎癸酉志重刊非重修也國朝最先
修志者爲宮紫元太史康熙府志稱泰州志郡人宮偉鏐修時在康熙癸丑
年十二雍正府志作順治間修誤志局設太史北園纂修爲興化陸公廷掄陸

修志軼事別具後條時邑人黃公雲張公麋共襄其事太史序稱懸圃仙裳

九草之功不可沒蓋紀實也然其時止纂秩官人物志數卷雍正州志凡例

卷四餘皆闕如雍正州志凡例云舊志止於明季本朝百餘年未經全修又

云海陵百年無修志之事此宮志未成之一證不知當日何以未勒成書之
故今春雨草堂全集有州志彙六卷才百頁初名微尙錄存其單行本余曾
見之有序有例言有圈點國朝人物如俞公鐸李公嘉允張公幼學董公大
用皆有傳外傳有淮張劉夫人兩傳與春雨草堂集中所刊志彙小異惜其
書不全上諸傳皆闕無從採錄且卷帙體例頗嫌雜亂亦非完本第其網羅

舊聞至爲覲縷匪太史此纂其湮沒多矣及雍正六年州牧上谷褚公世暄
創修州志其例首劉志即崇禎癸酉志次宮志即太史所纂數卷末以新增者附焉志成十
卷名雍正志一名褚志今邑中收藏家多有之以卷首有紅諭者爲初印本
當褚公修志時距國初百年故家遺獻凋喪略盡搜羅排纂戛戛乎難哉今
讀其志導諛貢媚之文往往而有封翁言行例入鄉賢貴人子弟必立佳傳
此乃志乘故常可爲噴飯者也自雍正戊申至道光甲申近百年而州志之
獄興獄未結而志已廢加膝墜淵董纂者誠無逃於訾議吹毛索癢訐訟者
豈盡出自公平至今都人士談及邑乘輒動色相戒視爲畏途將來纂修更
不知何時何人遂令二百年吾邑文獻止恃褚志孤行之本可勝悼哉可勝
悼哉

陸志

陸懸圃先生廷掄興化人工古文詞鼎革後不應試與同里宗子發元豫李

艾山沂稱昭陽三隱泰有王某者故興化人雄於貲慕廷掄名延課其子館

數載足不入市泰人亦無知者會制府風聞王惡將逮治王偵知計惟闔門

避邀廷掄俱掄不可獨坐王室伊唔不絕制府檄下州隸索王不得綈廷掄

以應適張桐軒琴進士於輿中見廷掄狀如頭陀棕蓑絹衣朱履銀鐙累累

無戚容心異之詢知無罪命隸解綈遣僕將車送詣宮紫陽檢討家桐軒卽

謁牧白其狀牧爲答隸桐軒隨過檢討與廷掄論史極合恨相見晚時許漱

雪農部承欽呂半隱太常潛皆寓泰與廷掄歡甚會州志闕修垂五十年州

牧延邑紳開局檢討之北園檢討欲藉手廷掄掄預約入局不與牧相見書

成勿勒其名牧悉如約凡牧來廷掄輒避去或有問則牧堂中廷掄榻所隔

障通言牧時以酒榼餽專致之不與衆同率以爲常今宮志三十餘目其前

序皆出廷掄手用史公自序法每三四行綽綽大可觀阮芸臺先生淮海英靈集稱其修泰州志體例精嚴爲時所稱非虛譽也

東城集

宋代鄉先輩文集百無一存祇周樞密海陵集二十四卷收入四庫然非讀中祕書者不得見也至前明諸老著作最著者如儲文懿柴墟集沈司馬鳳岡集凌僉憲舊業堂集陳太僕敬止集王心齋東厓易庵三先生合刻集宮太史春雨草堂集或從親知借讀或自書肆採購或爲友人投贈得盡窺全豹矣獨林東城公文集遍求不得心甚憾焉後偶從破書攤購得其集分上下二卷康熙府志載四卷者誤也上卷雜體文三十八首詩二十四首原闕二首下卷書簡六十六首集刊於嘉靖丙午公沒已數年矣初公沒之次年同里張淳輯公遺集俾公子藏之淳字此庵嘉靖丙午舉人官松滋縣令嘗

受學於公者也公子曉暉輩取淳所輯彙走會稽謁王龍谿適孔文谷督學浙中因謀付梓先屬唐荆川爲公校正其集校成遂開雕於浙三公者公講學故人唐王又與公同年故共襄其事今集有龍谿許穀張淳三序而孔唐反無序何邪梓成曉暉輩自浙取書板歸州牧馮公良亨移板州治廣印以行今本疑卽馮所印也公故戎籍嘗以餘子給事所中家貧幾廢學千戶王極器公召與子同學恩誼備至公補邑諸生而千戶沒未及見公成名集中祭王千兵文蓋壬辰成進士後爲千戶作也情詞悽愴若有餘恫公可謂不忘舊恩矣千戶子名烈嘉靖三十三年死倭寇之難真東城友也公四子曉暉曜昕曜字見城初生時華光祿南畹適過東城一見卽曰舉人後見城果以嘉靖甲子登賢書歷秋官郎因建言立儲謫廣西驛丞志稱卒贈尙寶寺寺丞乃萬曆時追贈也公孫佳材百朋萬瞻曾孫之翰之麟俱無聞入國朝

公裔有名蕃者中康熙丁巳武舉人有名章者善寫真有名廷樞者老諸生沒尙未久近則讀書種子幾絕蓋自見城沒後家世凌替公集之散失又曷足怪乎邑有數林其隸衛籍者公裔也

案公沒於嘉靖辛丑年四十四當生於弘治十一年戊午公以嘉靖戊子登賢書年三十一壬辰冠南宮年三十五自壬辰至辛丑僅十年耳中間

以母病告養在籍約一二年

公以某年九月十七日予告出京其答林退齋書云老母多病不能謀出姑俟明秋再爲

決計其簡王瑤湖云客歲九月老母中風得告歸省又答林巽峯云老母多病北上計且遲遲其供職京師者僅六七年

耳公父宏沒於壬辰前未及見公成進士今宏墓上敕贈碑文爲嘉靖十二年製公成進士之次年也時公由禮部主事調吏部文選清吏司主事贈如公官觀敕詞雖不逮祿養名德益彰數語可證公沒而母太安人尙在堂初公登第授職卽迎養安人於京邸安人不耐北方苦寒多病思歸

公具疏乞假送母不許因令妻孥侍安人南還

公簡桑南舉侍御書云四月十日老母已命妻孥侍

後安人中風病癱廢公告養歸省居久之病閒赴京補官未幾遂卒於

京師其應如皋黎令安定講席之聘疑亦在告時事此公出處生卒可略攷者因附記焉同時邑有呂懷健者鄉會試皆與公同榜官主事名列選舉今無有能舉其姓字者然則人之傳不傳科目又安足恃哉

繪事微言

繪事微言四卷邑人唐志契撰契字敷五一字元生明諸生此本收入四庫提要稱其删除蕪雜汰取菁英持論頗爲不苟顧傳本絕少庚寅儲价人爲余假諸祝家莊徐姓始得見之凡四卷以元亨利貞爲四集元集論畫法畫理名論多可採餘三集皆刪纂昔賢撰著自南齊謝赫品畫錄迄明季屠赤水沈朗臞諸家悉備焉然所採祇山水一門若人物翎毛花卉諸譜訣皆不

錄蓋先生工山水餘非其所長然山水爲十三科之首畫家實亦以山水爲大宗也卷首有陳眉公鄭超宗沈淵淵三序及自序核其剗削之歲則天啟之六七年也序後列校正姓氏數十人皆工繪事者弟志尹姪日昌與焉邑人如李芳字湘洲趙穀字雲石匪挂名卷端後人末由知其名其刻有圈點然梓工頗麤惡譌字俗書極多余以傳本少急錄全帙入叢書其譌字可意解者正之否則姑闕焉獨念敷五以明季諸生草茅撰述且所纂不過藝事微言當其吮毫擲管丹黃並下時其爲後人取以覆瓿及拉雜摧燒均未可知顧猥蒙天府搜羅藏之中祕提要數語頗極褒嘉亦未始非儒生之榮遇也然其中亦有幸有不幸焉

陋軒詩四刻

陋軒詩以周櫟園司農所刻爲最初本康熙改元司農來揚州因汪舟次知

楚人爲序其詩梓而行之名曰陋軒詩司農所命也同時作序者有計甫草

王阮亭阮亭時官揚州推官

順治十七年任

因司農知楚人雪夜被酒爲作詩序翼

明走急足寄陋軒當在是時康熙六年錢塘汪芾斯分司東淘雅重先生爲

哀其全集得詩四百首續梓以行吳周祚序言之甚詳汪公當自有序惜不

傳厥後方于雲

鴻達

合先生前後詩重付剞劂汪蛟門序稱其刊刻精好今

世所傳陋軒詩原刻卽方本余家藏二部一爲先君子所遺今歸家仲余所

藏乃妻大父仲松嵐先生圈評本內子巾箱中物也周汪兩刻余未見其最

後者嘉慶時拼茶場繆竹癡所刊刻手遠遜於前且原詩六卷離爲十二失

其舊矣然其表章前哲之功正不可沒此陋軒詩四刻之原委也頃選先生

詩入海陵詩徵爲國朝詩人之冠特詮次其說

詩觀二集

丹徒王柳村輯羣雅集乞序於法梧門祭酒祭酒答詩云海陵鄧孝威選詩
黃葉村老年應徵召襍被春明門旅夜勤甄綜雪寒酒弗溫忍飢事吟嘯坐
對孤燈昏詰朝王新城狹巷停高軒漁洋手校本今尙詩龜存云云自注新
城手校詩觀二集余買自廠肆考康熙十七年詩觀二集刊成是年秋孝威
先生應鴻博入都是集必初印本先生攜至京師投贈新城而新城爲之校
訂者也得祭酒此詩後人倍加鄭重矣

詩觀無四集

揚州府志國朝詩別裁集皆稱詩觀凡四集後人遂有四集之疑案孝威先
生於康熙九年庚戌選詩觀初集十一年壬子梓行十三年甲寅選詩觀二
集十七年戊午梓行是年秋應鴻博入都十八年己未三月朔赴試四月授
內閣中書舍人銜五月謝恩還山時公年六十三矣二十四年乙丑復至郡

寓董子祠選詩觀三集三集開雕於二十八年時公已先沒不及見公壽蓋近七十云三集選事皆先生三子勸相主之選政頗濫安得復有四集之選邪乾隆十三年如皋仲蒼璧先生之琮來吾邑購詩觀全板去板已殘朽先生鳩工於家殘者補之朽者易之板復完好印本盛行如皋黃丈楚橋學圮告余蒼翁之購詩板由胡先生西垞裘錕慫恿之西垞游秦久稔知鄧氏板可售及至皋下榻蒼翁古樹園偶言及翁欣然購之價止八十金其修補盡出西垞手後因書禁嚴仲氏舉板繳縣解司然集內祇應禁之人奉旨抽燬原書仍准行世惜抽燬後仲氏懼禍竟未領回聞全板久貯江寧夫子廟中悉歸煨燼矣今諸集字跡明淨無仲序者原板也字跡稍模糊有仲序者修板也板毀後書不可多得三集尤尠余家初二三集俱全先君子所藏子孫珍之

詩觀無四集余既辨之詳矣後閱張山來友聲集中載鄧劭榮

字若雍孝威次子

與

山來書有拙選四集已梓多篇特懇瑤章以光梨棗等語又云澹心先生詩承慨允代梓位次在四卷之首必得佳吟連篇梓去殊覺可觀云云可見當日實有四集之刻矣時孝威先生已沒若雍此舉特欲續阿翁選席耳近詩觀初二三集閒有傳本四集則多未之見當日書成與否尙未可知卽蒼璧先生重輯詩觀序亦止稱初二三集略未言及四集是則可疑也書以俟攷

依歸草

國朝二百年中邑人工古文者推海安張良御太史所撰依歸草有初二三刻太史爲文力追歸太僕故以依歸名其集第傳本絕少求之數年不可得戊子從陸君筦泉假得初刻本筦泉海安人太史娶於陸故陸氏有其書書凡二卷文四十二篇卷首有太史妻大夫陸吳州先生序付梓時太史年纔

三十三其文章成就已如此宜其卓然以古文名家也庚寅攜松姪赴郡試於書肆得三刻本凡十卷文百餘篇乃太史子沆取初二刻稍加沙汰彙而梓之續二卷亦沆所增視初刻數倍而加精焉余最喜太史文巡環百讀其味咀而愈出雖專法熙甫實遠宗廬陵而龍門乃其所自出也集中文有關係者居多應酬作絕少聞有之亦迥出尋常窠臼之外而於忠孝節義有裨人心風俗尤極力摹寫故名作林立多可採者江都焦丈里堂學問淹通古文好手也極服膺太史文謂其序事有體足爲學者取法且鈔綴太史文最多自爲之序見所著雕菰樓集頃余選太史文三十餘篇入文徵單爲一卷自詡決擇甚精惜無從得焦丈選本互證之余嘗論鄉先輩工古文者寥寥前明作手首推儲文懿凌僉憲陳太僕次之餘無足數國朝則太史巍然稱名家若王石袍以氣勝而謹嚴不逮然自石袍而後求其能爲石袍之文者

亦鮮古文詎易言哉

案焦丈云已未於市上得依歸草十卷越五年壬戌又得其子沆所重校本前十卷稍有增易續刻二卷共文

二十篇其應試策判與焉觀此則己未所得是第二刻壬戌所得是第三刻余所購亦第三刻也第二刻余未見

東陵聖母

東陵聖母口訣學道慎勿言有多爲山神百精所試夜臥閉目存眼童子在泥丸中令內視身神長生升天云云此段見陶貞白真誥原注出神仙傳今漢魏叢書中神仙傳並無此文攷叢書所收洪傳乃後人撮錄太平廣記及神異諸書妄爲增益不足爲據當求洪所纂神仙傳古本正之

樂真人

樂真人名子長晉海陵人白日飛昇梁昭明太子與邵陵王綸至海陵以子長故宅爲觀今城西伏龍橋一名金橋太子港皆昭明至海陵遺蹟至宋紹興

十三年邑建文孝廟以祀昭明攷真人得道事蹟載籍無傳卽晉葛洪神仙

傳亦未甄錄疑真人世次在洪後故弗及耳及梁陶貞白先生撰真誥中載太玄真人告許長史我嘗見南陽樂子長淳朴之人不師不受順天任命亦不知修生之方行不犯惡德合自然雖不得延年度世死登福堂練神受氣名賓帝錄遂得補修門郎位亞仙次緣天資有分亦由先世積德流慶所關若使其粗知有攝生之理兼得太上一言之訣如此求道無往不舉矣觀此則子長天資粹美不假師受自契真修白日冲舉志乘所載亶其然乎海陵舊號海陽亦號東陽故有南陽之號仙經稱引類多愴恍若必例以考據家墨守方輿紛紛聚訟則失之遠矣

案靈寶真靈位業圖列樂子長於第四之左位其書託名陶隱居蓋附益真誥而成

范文正

冷齋夜話云范仲淹少時求爲秦州西溪監鹽其志欲吞西夏知用兵利病耳而麻舍多蚊蚋文正戲題其壁曰飽去櫻桃重飢來柳絮輕但知離此去

不用問前程云云攷公於天聖中監海陵西溪鹽稅非秦州也惠洪誤秦爲秦又附會其說謂文正求爲西溪監鹽爲欲吞西夏起見真癡人說夢話矣

王禹錫

海陵三仙傳王禹錫撰見明陸楫古今說海初不詳其爵里世次天一閣書

目載海陵三仙傳宋通直郎僉書鎮江軍節度判官廳公事賜緋魚袋王禹

錫撰詳其世次官爵矣而不著其里貫攷州志選舉王禹錫登紹興丁丑_{十二}

_{年七}王十朋榜進士而神翁沒於大觀二年周處士沒於建炎二年唐先生沒

於紹興七年禹錫與三仙世次相近且同里閑故撰傳極爲覲縷然則撰海

陵三仙傳爲邑進士王公禹錫無疑也又攷王直方詩話云王禹錫行十六

與東坡有姻連嘗作賀知縣春雨詩云打葉雨拳隨手重吹涼風口逐人來

東坡云十六郎作詩恁得如此入規矩案坡公沒於建中靖國元年距紹興

丁丑五十七年禹錫以詩謁坡公不知在何時年卽甚少然自坡沒後又五十七年始成進士大率年蓋七八十矣以時攷之恐無是理然則直方詩話所載之王禹錫當別是一人非吾邑王公也邑王公科分見州志選舉官爵見天一閣書目餘無攷

周暎

邑周暎字伯暘號方山又自號識字耕父宋元時人浦江吳清翁宋季嘗爲義烏令元初隱於吳溪至元丙戌延宋遺老謝皋羽輩主於家創月泉吟社以范石湖春日田園雜興爲題四方吟士投卷者二千七百三十五人入選者二百八十人自第一至五十名贈物各有差暎則入選第十九名者也宋詩紀事收暎送僧歸蜀春日田園雜興二詩元詩選癸集祇收暎春日田園雜興一首小傳作泰山人山乃州字之譌不待辨而於周暎外別收周伯暘

詩四首小傳稱伯陽字霽海不詳其里貫所收四詩內有送僧歸蜀詩卽宋詩紀事周陳作也陳字伯陽元詩選殆歧而二之果爾則伯陽四詩當併入

周陳名下不當重出一卷中兩見也周陳詩周伯陽詩俱見元詩選癸集甲卷如伯陽別是一人

則樊榭收送僧歸蜀詩爲陳作亦必有誤矣元詩癸集乃秀野未訂之彙沒

後經後人補竄嘉慶三年其書始出殆不能無誤耳案陳音簡明也又音闌陰乾也陽義亦訓明日

乾物也二義皆通然周陳之名讀簡不讀闌其字從陽不從陽宋詩紀事元詩選均作字伯陽誤矣陳嘗爲白珉作湛淵靜語序自稱海陵周陳伯陽甫

似似足據

蔡據

夷堅志淳熙元年嘉興蔡據赴蘄州黃梅縣任泛舟大江過蘄口是夜大風拔木舟碎於巨浪蔡抱持底板浮漾意家人盡溺死矣迨旦風小定視之則皆踰聚板上不失一人急喚漁舟載至南岸居人爭來慰勞且云昨夜風雷